



02.11.2018

UKA 2018/152

### Naqqiut

Siunnersuut 25. juli 2018-meersoq taarserpaa

(Makku naqqiutigineqarput: siunnersuuteqartup atia (Inatsisartunut ilaasortaq Sara Olsvig, Inuit Ataqatigiit) taarserneqarpoq (Inuit Ataqatigiit Inatsisartuni ilaasortaataat))

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Naalakkersuisut kingusinnerpaamik UPA2019-imut Kalaallit Nunaanni pisortatigoortumik piitsuussutsimik killiliissummik aalajangersaanissaat pillugu Inatsisartut aalajangiiffigisassaattut siunnersuut.**

(Inuit Ataqatigiit Inatsisartuni ilaasortaataat)

#### Tunnngavilersuut:

Kalaallit Nunaanni piitsuulluni inuusoqarpoq. Inuiaqatigiinni innuttaasut ilaat aningaasaqarniarnikkut ilungersunartorsiorlutik inuuniarnermi atugaqarnerat inuiaqatigiinnit isiginnaaginnarneqarnera inooqataaffigisinnaanngilarput. Inuiaqatigiittut inuttut ataasiakkaattut tunnngaviusumik pisinnaatitaaffiit, soorlu nerisasaqarnissamut ineqarnissamullu kiisalu ataqqinassuseqartumik inuuneqarnissamik pisinnaatitaaffeqarnerup qulakkeernissaannut pisussaaffeqarpugut. Pisinnaatitaaffinnut taakkununga soorunami aamma suliffissarsiorlissamut pisussaaffik, inuiaqatigiinnut ilapittuinissaq inuillu ataasiakkaat imminnut ilaquuttaminnullu ataqqinassusilimmik inuuneqarnissamut suliniuteqarnissaq aamma pisussaaffigineqarput.

2018-mi Naalakkersuisut “Piitsuussuseq Naligiinnginnerlu - Naligiinnginneq piitsuussuserlu kiisalu piitsuussutsimut killiliussassamik nunatsinni aalajangiussinissamut periarfissat pillugit nassuiaat” saqqummiuppaat. Piitsuussutsip akiornissaanut nassuiaat sakkussatsialaavoq.

Kalaallit Nunaannut immikkut tulluarsakkamik pisortatigoortumik piitsuussutsimut killiliinissaq uuttuusiornissarlunniit pisariaqartipparput. Piitsuussutsimik killiliinissamut uuttuusiornermullunniit suliaqarnermi innuttaasut tunnngaviusumik pisariaqartitaannut innuttaasullu immiut pilersornikkut inuuniuteqarneqarnerannut paasinarsisitsisumik aaliangersaaneq tunnngaveqassaaq, tassa imaappooq ilanngullugit innuttaasut ulluinnarni inuuniarnermini pisariaqartitaat aamma aalisarnermik piniarnermillu inuuniuteqarneq.

# INUIT ATAQATIGIIT

## Inatsisartuni



Matumani uuttukkavut oqinnerusumik iliuuseqarfigisinnaavavut. Nassuiaasiami ilisimasamik pissarsinitsigut pisortatigoortumik piitsuussutsimut killiliinissamik uuttuusiornissamilluunniit aalajangiinissamut pitsaasumik toqqammavissaqalerpugut. Inoqatitsinnut aningaasameerlutik inuusunut, minnerunngitsumillu ilaqutariinnut meerartalinnut piitsuussutsimik pitsaanngitsumik sunnerneqaqqasunut politikikkut ileqqorissaarnikkullu iliuuseqassalluta pisussaaffeqarpugut.

Nunarsuarmioqatigiit piitsuussutsip akiornissaanut ataatsimoorput. Tamanna nunarparpassuit Naalagaaffiit Peqatigiit piujuartitsineq tunngavigalugu ingerlatsinissamut anguniagaannik 17-iusunik tapersiinerannit takussutissaqarpoq. Anguniagarmi siulleq tassaavoq piitsuussuseq nungusassallugu.

Piitsuulluni inuunerup nassatarisaanik nunarsuarmi ilisimasat naapertuuttut tunngavigalugit isumaginninnikkut suliniutit pioreersut katersorlugillu, ataqatigiissarlugillu patajaallisarnissaat pisariaqarpoq, inunnullu piitsuullutik inuusunut ataatsimoornerusumik iliuuseqarnissatsinnik patajaallisaallutalu annertusaasariaqarluta. Taamaaliornikkut ersarinnerusumik isumaginninnikkut politikeqarnissamut sakkussaqaalissaagut peqatigisaanillu isumaginninnikkut inatsisit pisariaqartitsivissortunut iluaqutaanerusunngorlugit qanoq ilusilernissaannik ilisimasaqarnerulissalluta.

Ilaqutariit meerartallit piitsuullutik inuunerat akuersaarumangilarput. Ingammik meeqqat nerisassamik inigisamillu amigaateqarantik inuusinnaanissamut pitsaasumik periarfissinneqartariaqarpavut, taamaalillunilu perornerminni inuusaatsimik kingornussamik qimatsinissamut periarfissinneqarlutik.

Piitsuussutimut killiliinikkut uuttuusiornikkulluunniit piitsuussutsip annikillisarnissaanut inuiaqatigiinnilu naligiinnermik annertusaanissamik aallussilluta sulinissamut periarfissaqaalissaagut. Naligiinneruneq inuiaqatigiinnik nukittunerusumik pilersitsisarpoq, taamaaliornikkut amerlanerit inuiaqatigiinnut kivitseqataallutillu pilersueqataasarput. Taamaammat siunertaqartumik tamakkiisumillu piitsuussutsimik akiuiniarluni suliniarnerup partiinit tamanit politikikkut soqutigineqartariaqarpoq.

Naggasiullugu “Piitsuussuseq Naligiinnginnerlu - Naligiinnginneq piitsuussuserlu kiisalu piitsuussutsimut killiliussassamik nunatsinni aalajangiussinissamut periarfissat pillugit nassuiaat” 2018-meersoq piitsuussutsimut killiliussassamik nunatsinni aalajangiussinissamut periarfissat pillugit qulaajaasoq ivertippara.<sup>1</sup>

Siunnersuut akuerineqarluni Ilaqutariinnermut Peqqissutsimullu Ataatsimiititaliamut suliaannngortinneqassasoq neriuutigaara. Qujanaq.

### **Pisortanut aningaasatigut allaffissornikkullu kingunerisassai:**

2018-imi Naalakkersuisuusut “piitsuussuseq naligiinnginnerlu- Naligiinnginneq piitsuussuserlu kiisalu piitsuussutsimut killiliussassamik nunatsinni aalajangiussinissamut periarfissat pillugit

<sup>1</sup> [https://naalakkersuisut.gl/~media/Nanoq/Files/Publications/Familie/GL/Piitsuussuseq\\_pillugu\\_nassuiaat.pdf](https://naalakkersuisut.gl/~media/Nanoq/Files/Publications/Familie/GL/Piitsuussuseq_pillugu_nassuiaat.pdf)

# INUIT ATAQATIGIIT

## Inatsisartuni



nassuiaat” saqqummiuppaat. Naligiinnginneq piitsuussuserlu qanoq paasineqartariaqarneri sammineqarput kiisalu piitsuussutsimut killiliinissamut peruserineqarsinnaasut nassuiaammi sammineqarlutik.

Naatsorsueqqissaatarfiup ”anigaasaqarnikkut ilungersunartorsiortut” nunatsinni inuit anigaasaqarnikkut piitsuunerannik ersresitsisoq piitsuussutsimik paasinninnermut ataqatigiissarneqarsimasoq saqqummiuppaat. Taamaammallu pisortatigoortumik piitsuussutsip killilerneqarnera anigaasartuuteqarujussuannikkaluarluni aalajangersarneqarsinnaasoq naliliutigineqarpoq, suliammut tamatumunnga piareersaatit naammassineqareersimmamata. Taamaammallu suliaq tamanna A/C fuldmægtigip ukiumut akissarsiaasa affaasa iluanni suliarineqarsinnaanera naapertuussorineqarpoq, tassa 250 koruunit missaannik nalileqartoq.

**Namminersortunut anigaasaatigut allaffissornikkullu kingunerisassai:**

Soqanngilaq.

**Innuttaasunut anigaasaatigut allaffissornikkullu kingunerisassai:**

Soqanngilaq.